

Faggiemq Raehsoem Baengh Gaenx Muz

宝剑锋从磨砺出

——Geiq Boux “Hagseng Cunghyoz Ceiq Gyaundeide Daengx Guek” Banh Ciginj

□ Lienz Suibib



▲Banh Ciginj.

5 nyied 8 hauh banringzgvaq, youq laj gorungz hung Yungzsuij Cunghyoz, baezneix dwg bouxsij daihngaih baez raen Banh Ciginj lo, boux hagseng gauhcungh sam nienzgaep neix ngamq ndaej aen cwnghauh “Hagseng Cunghyoz Ceiq Gyaundeide Daengx Guek”. Aenvih ngoenzbonz banhaemh ngamq doek ciengz fwn hung ndeu, gwnz aen daengqrin laj gorungz dauqcawq dwg gij mak gorungz deng fwnraemx cung doek roengzdaej haenx. De itmienh souhsib gij mak gorungz doek daengz gwn daiz haenx, baetuet dieg iq ndeu hawj dou cuengq fwnz, itmienh doiq bouxsij riunyumnyum.

Gannanz haemzhoj, giendingh saenqniemh daihdamj byaij baenaj

Banh Ciginj seng youq Yungzsuij aen yanghcin ceiq gya he—Ganh-dung Yangh, aen mbanj neix daengz yienhsingz aeu naengh ci baenz 5 diemj cung. Ndaw ranz de gwnz miz daxbuz 80 lai bi ndeu, laj miz boux daeglwg lungzau 3 bi ndeu. Ranz de cawz le miz aen daizseifueng iq gwnhaeux yungh ndeu nem geij aen daengqgeg youq henz cauq, caiq mbouj miz gijmaz gyasei baenziengh lo.

Aenvih ndaw ranz gungz, Banh Ciginj caeuxcaeux couh rox bang ndaw ranz faendan gij naek gij dwgengz saedceij lo.

Youq ranz seiz, saegbuh, cawj-haeux, rapraemx, guh hongnaz hong-reih, boux lwgsai neix beij lwgsau cung gaenx. Boh Banh Ciginj dwg boux vunzguhnaz, simsienh nem baknaek, de yawjraen ndaw ranz baenzneix gungz, daeglwg gvaq ndaej baenzneix hoj, ndaw sim de gig in, gig mboujsij, danhseih de caemh mbouj rox yienghlawz yiengq daeglwg de gangj gij sim'in de. 2014 nienz gvaqcieng, boh de gwn laeuj fiz le ma ranz, gaem gij fwnz Banh Ciginj ndaetndi' ndi, doq raemxda rihnenng-neng doq doiq de gangj: “Doiq mbouj hwnj... doiq mbouj hwnj...”

Dingqny i gij vah boh de, Banh Ciginj sim'in raixcaix, de nyengh nyaenx raemxda youq ndaw da daj-

cieng haenx, dauqcungz dawz bonj saw hwnjdaej yawj, de caegcaeg youq ndaw sim de roengz le gietsim: Dingj roengzbae, caiq gvaq mbouj nanz couh ndaej bienq ndei lo.

Laeq lwgsai gungz neix, youq ndaw sim laeglwd de iugouz swheij aeu roengzrengz doeg saw. Moix ngoenz de caeuxcaeux couh hwnq-mbonq doeg saw boih saw, banhaemh youq gyausiz caemh swheij hag daengz gyanghwnz cij ma ninz. Coumued, de caeuq doengzhag de itheij dwkgiuz, dwk sat le couh boux ndeu youq ndaw gyausiz hagsib, fanfoek dingq Yinghiy dinghliz, miz seiz, youq gwnz ci ma ranz, de hix cagaenj seizgan hagsib. Daengx nienzgaep gausam ndaw hagdangz de gungh miz it cien lai vunz, moix baez gaujsi, mboujlwnh dwg gaujsi iq roxnaeuz gaujsi hung, cungj ndaej youq gwnz baizmingz bak mingz gaxgonq haenx cimh raen gij mingzcoh de. De camgya sijsaw doxdax, gak loih sij faenzcieng doxdax, dijuuz doxdax daengj, gak hangh doxdax mboujlwnh dwg ndaw hag guh, ndaw yienh banh roxnaeuz ndaw si banh, de ndaej baizmingz ndei haujlai baez.

Funghvuengz souhnanh, faenh sim haenqrengz doegsaw lij gig giendingh

Banh Ciginj doeg gaungeih bi haenx haggeiz seizcou, daxmeh de deng caz ok baenz bingh' aiz diuz-saej. Ngoenz haenx banringzgvaq, daxmeh de mbouj rox swheij baenz bingh' aiz, vanzlij lumj ciengzseiz nei naiqnueknuek soengq de bae daengz bakdouz yihiy. Boux lwgsai daj iq couh giengiengz neix, fuk dozsiengq gwnz binghlig daxmeh de sij miz song cih saw “bingh' aiz” haenx itcig youq ndaw uk de cienq gvaqdaej cienq gvaqbae, raemxda riengz gij vunqdin de bonghbuat, loenqdoek gwnz diuz roen daj yihiy daengz hagdangz haenx.

Daeggo de rox gij bingh daxmeh de le, sikhaek daj dieg rog dauqma, ciep daxmeh de bae daengz Liujcouh guh valiuz. Ywbingh bae ngaenz gig lai, doiq aen ranz gungz neix ma gangj, couh lumj youq gwn nae gya mwi, saedceij caen dwg hoj raixcaix. De gangj, miz geij mbat de cungj mbouj siengj doegsaw, siengj bae rog guh hong canh ngaenz lo.

“Gij geizhanh vunzbingh baenz-aiz gangj dingz couh dingz. Gou yiemq daxmeh gou daiq lai lo, gou siengj caeuq daeggo gou okbae guh hong, yungh naengzlig swheij hawj daxmeh gou gvaq ndaej ndei di.” Gij siengjap ndaw sim de deng daxmeh de yawjok lo.

“Hag cihsiz cijndaej gaijbienq minghhoen.” Daxmeh de yienznaeuz mbouj rox saw, mingzcoh bonjfaenh cungj mbouj rox sij, danhseih de iugouz Banh Ciginj aeu ciensim

doegsaw. Menhmenh dwk de cij siu bae gij siengjap mbouj doegsaw haenx.

“Daj seizhaenx hwnj, ndwen-naengz gij ngaenz gwnhaeux gou cij yungh mbouj mauhvaq 300 maenz. Banhaet gou cij gwn aenbau, daegbied siengj gwn noh couh cawx di hoj-duijcangz, yienghneix couh beij cawx byaeknoh noix caet gak ngaenz lo.” Banh Ciginj doq gangj doq riu.

Gij saedceij de mbaet gwn mbaet daenj, danhseih mbouj caengz yingyangj de yunghsim roengzrengz doegsaw. Youq hwnjdangz seiz, de couh nyinhcaen dingq gangj; roengzdangz le, de couh ciensim guh daez un saw. Ciengzseiz, de bangcoh gyoengq doengzhag de gig yiedsim, miz geij mbat, de ndaej hwnj daiz dang boux “lauxsae iq”, bang gyoengq doengzhag de siu bae gij haemz ndawsim, gujli doenghboux cingzcek mbouj ndei haenx lai roengzrengz doegsaw.

Ndaw feiz dauqseng, buek-mingh gouz ak ndaej haenhndei

Sojmiz gij hoj, gij nanz, gij haemz saedceij ginglig gvaq he, cungj gikcoi de engqgya roengzrengz doegsaw, engqgya iugouz swheij buek-mingh gouz ak.

2015 nienz 6 nyied faenh, aen hozdung ra boux “Hagseng Cunghyoz Ceiq Gyaundeide Daengx Guek” cienzmienh haidoengh. Yungzsuij Cunghyoz doigawj Banh Ciginj bae camgya bingzsenj. Boux lwgsai hauqgingq vunzlaux gyaenz vunz ndaw ranz gyaenz vunzwnq, gaenxmaenx simvuen, ndawsim gengangh, roengzrengz hagsib yunghsim gvaq saedceij neix, daj buek hagseng cunghyoz maenhndei daengx guek haenx ndaej senj baenz “Hagseng Cunghyoz Ceiq Gyaundeide Daengx Guek”, baenz Yungzsuij boux dog ndaej aen cwnghauh ndei neix, caemh dwg Liujcouh Si haj boux hagseng ndaej cwnghauh ndei neix ndawde boux ndeu.

4 nyied 28 hauh, Banh Ciginj souh' iu daengz Liujcouh Si guh aen yienjgangj cawjdaez dwg “Siengj-

muengh Cungguek—Hauxseng Buek Hag Ceiq Gyaundeide”. Youq yienjgangj gaxgonq, de daj denva ma ranz, boh de rox de ndaej daiqbiuj hagdangz bae, hix dwg daiqbiuj Yungzsuij daengz Liujcouh Si guh yienjgangj, bouxsai lauxsae nem baknaek neix doq dingq doq angq dwk daej lo.

“Boh gou vih gou haengihei, miznaj, ndaenggon. Gou aeu engqgya roengzrengz hagsib, yienghneix cijndaej engqgya miz rengz nem mbeihung dwk bae mienhdoi deunqyx daengzcog.”

Boux banhcuijin singq Siu Banh Ciginj naeuz, moznij gaujsi baez daihsam, gij faensoq Banh Ciginj liz itbaenij cij ca geij faen lo. De yungh “caen” “saed” song cih saw neix ma dajbeij Banh Ciginj—de doiq lauxsae doengzhag caen' ei, doiq hagsib caensim; guh vunz guh hong cungj lauxsae.

Doengzhag de Hoz Cingyuz gangj: “Coumued ciengzciengz raen Banh Ciginj youq ndaw gyausiz buekmingh hagsib, ndaw hagdangz baenzneix hung, danhseih gij ngaenz roengzrengz hagsib de hawj gou gamjdaengz hungsang raixcaix. Youq gij saedceij baezlaeng, gou saenq de itdingh aeundaej sojmiz doxgaiq de siengj nem simmuengh ndaej daengz haenx.”

Banh Ciginj naeuz, ndaej bingzbaenz “Hagseng Cunghyoz Ceiq Gyaundeide” aen cwnghauh ndei neix, daegbied docih lauxsae dazyinx songyauq nem doengzhag bangcoengh, gou aeu ndaejgeiq gij simndei gyoengqde, aeu gij raeujrub neix guh doenghlig iugouz swheij mboujduenh roengzrengz byaij roengzbae, mboujduenh bienq ak, bienq rengz, caenh naengzlig swheij guh daengz “Hagseng Cunghyoz Ceiq Gyaundeide”.

Linghvaih, de gangj gaugauj sat le, de bwh dienz ciyen swfan loih, maqmuengh swheij ndaej baenz boux lauxsae ndeu, ndaej son' gyaug ok hagseng maenhndei engqgya lai.



▲Banh Ciginj dinga roq gig nyinhcaen.